

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरूभ्यो नमः

२४

# चउसरणं-पढमं पडुण्णयं

मुनि दीपरत्नसागर

Date : / / 2012

Jain Aagam Online Series-24

# २४ गंथाणुक्कमो

कमंको	विसय	सुतं	गाहा	अणुक्कमो	पिट्ठंको
१	आवस्सय अत्थाहिगार	-	१-७	१-७	२
२	मंगल-आइ	-	८-९	८-९	२
३	चतुःसरण	-	१०-४८	१०-४८	२
४	दुक्कडगरिहा	-	४९-५४	४९-५४	४
५	सुक्कडाणुमोअणा	-	५५-५८	५५-५८	५
६	उवसंहार	-	५९-६३	५९-६३	५

२४

## चउसरणं – पढमं पडण्णयं

- [१] सावज्जजोगविरई उक्कित्तण गुणवओ अ पडिवती ।  
खलिअस्स निंदणा वणतिगिच्छ गुणधारणा चेव ॥
- [२] चारित्तस्स विसोही कीरइ सामाइएण किल इहयं ।  
सावज्जेयरजोगाण वज्जणास्ससेवनत्तणओ ॥
- [३] दंसणयारविसोही चउवीसायत्थएण किच्चइ य ।  
अच्चब्भुअ गुणकित्तण रूवेण जिनवरिंदाणं ॥
- [४] नाणाईआ उ गुणा तस्संपन्नपडिवत्तिकरणाओ ।  
वंदणएणं विहिणा कीरइ सोही उ तेसिं तु ॥
- [५] खलिअस्स य तेसिं पुणो विहिणा जं निंदणाइ पडिकमणं ।  
तेण पडिक्कमणेणं तेसिं पि अ कीरण सोही ॥
- [६] चरणाइयाइयाणं जहक्कमं वणतिगिच्छरूवेणं ।  
पडिकमणासुद्धाणं सोही तह काउसग्गेणं ॥
- [७] गुणधारणरूवेणं पच्चक्खाणेण तवईयारस्स ।  
विरियायारस्स पुणो सव्वेहि वि कीरण सोही ॥
- [८] गय वसह सीह अभिसेय दाम ससि दिनयरं झयं कुंभं ।  
पउमसर सागर विमानभवन रयणुच्चय सिहिं य ॥
- [९] अमरिंद नरिंद मुणिंद वंदियं वंदिउं महावीरं ।  
कुसलानुबंधि बंधुर-मज्झयणं कित्तइस्सामि ॥
- [१०] चउसरणगमन दुक्कड-गरिहा सुकडाऽनुमोअणा चेव ।  
एस गणो अनवरयं कायव्वो कुसलहेउ ति ॥
- [११] अरिहंत सिद्ध साहू केवलिकहिओ सुहावहो धम्मो ।  
एण चउरो चउगइ-हरणा सरणं लहइ धन्नो ॥
- [१२] अह सो जिनभत्ति भरुत्थरंतरोमंचकुअकरालो ।  
पहरिसपणउम्मीसं सीसंमि कयंजली भणइ ॥
- [१३] रागद्वोसारीणं हंता कम्मगट्ठगाइअरिहंता ।  
विसयकसायारीणं अरिहंता हुंतु मे सरणं ॥
- [१४] रायसिरिमवक्कसित्ता तवचरणं दुच्चरं अनुचरित्ता ।  
केवलसिरिमरहंता अरहंता हुंतु मे सरणं ॥
- [१५] थुइवंदनमरहंता अमरिंद नरिंदपुयमरहंता ।  
सासयसुहमहंता अरहंता हुंतु मे सरणं ॥

- [१६] परमनगयं मुणिंता जोइंद महिंदझाणमरहंता ।  
धम्मकहं अरहंता अरहंता हुं तु मे सरणं ॥
- [१७] सच्चजियाणमहिंसं अरहंता सच्चवयणमरहंता ।  
बंभव्वयमरहंता अरहंता हुंतु मे सरणं ॥
- [१८] ओसरणमवसरिता चउतीसं अइसए निसेवित्ता ।  
धम्मकहं च कहंता अरहंता हुंतु मे सरणं ॥
- [१९] एगाइ गिराऽनेगे संदेहे देहिणं समं छित्ता ।  
तिहुयणमनुसासंता अरहंता हुंतु मे सरणं ॥
- [२०] वयणामएण भुवनं निव्वाविंता गुणेषु ठावंता ।  
जिअलोअमुद्धरंता अरहंता हुंतु मे सरणं ॥
- [२१] अच्चब्भुय गुणवंते नियजससहर-पसाहियदियंते ।  
निययमनाइअनंते पडिवन्नो सरणमरिहंते ॥
- [२२] उज्झिअ जरमरणाणं समत्तदुक्खत्तसत्तसराणाणं ।  
तिहुअणजनसुहयाणं अरहंताणं नमो ताणं ॥
- [२३] अरहंतसरणमलसुद्धि लद्धसुविसुद्ध सिद्धबहुमानो ।  
पणयसिररइयकरकमल सेहरो सहरिसं भणइ ॥
- [२४] कम्मट्ठक्खयसिद्धा साहाविअ नाणदंसणसमिद्धा ।  
सच्चट्ठलद्धिसिद्धा ते सिद्धा हुंतु मे सरणं ॥
- [२५] तिअलोयमत्थयत्था परमपयत्था अचिंतसामत्था ।  
मंगलसिद्धपयत्था सिद्धा सरणं सुहपसत्था ॥
- [२६] मूलक्खय पडिवक्खा अमूढलक्खा सजोगिपच्चक्खा ।  
साहावियत्तसुक्खा सिद्धासरणं परममुक्खा ॥
- [२७] पडिपिल्लियपडिनीया समग्गझाणग्गिदइढभववीया ।  
जोईसरसरणीया सिद्धा सरणं समरणीया ॥
- [२८] पावियपरमानंदा गुणनीस्संदा विदिण्ण भवकंदा ।  
लहुईकयर वि चंदा सिद्धा सरणं खवियदंदा ॥
- [२९] उवलद्धपरमबंभा दुल्लहलंभा विमुक्कसंरंभा ।  
भुवनधरधरणखंभा सिद्धा सरणं निरारंभा ॥
- [३०] सिद्धसरणेण नयबंभहेउ साहुगुण जनियअनुरागो ।  
मेइणिमिलंतसुपसत्थ-मत्थओ तत्थिमं भणइ ॥
- [३१] जिअलोयबंधुणो कुगइसिंधुणो पारगा महाभागा ।  
नाणाइएहिं सिवसुक्ख साहगा साहुणो सरणं ॥
- [३२] केवलिणो परमोही विउलमई सुयहरा जिनमयंमि ।  
आयरिअ-उवज्झाया ते सच्चवे साहुणो सरणं ॥

- [३३] चउदसदसनवपुव्वी दुवालसिक्कारसंगिणो जे य ।  
जिनकप्पअहालंदिअ परिहारविसुद्धिसाहू य ॥
- [३४] खीरासवमहुआसव संभिन्नस्सोयकुट्ठबुद्धी ।  
चारण वेउव्वि पयानुसारिणो साहुणो सरणं ॥
- [३५] उज्झियवइ विरोहा निच्चमदोहा पसंतमुहसोहा ।  
अभिमय गुणसंदोहा हयमोहा साहुणो सरणं ॥
- [३६] खंडिअसिनेहदामा अकामधामा निकामसुहकामा ।  
सुपुरिसमनाभिरामा आयारामा मुनी सरणं ॥
- [३७] मिल्हियविसय कसाया उज्झियघरधरणिसंगसुहसाया ।  
अकलियहरिस विसाया साहू सरणं गयपमाया ॥
- [३८] हिंसाइदोससुन्ना कयकारूण्णा सयंभुरूपन्ना ।  
अजरामरपहखुण्णा साहूसरणं सुकयपुण्णा ॥
- [३९] कामविडंबनचुक्का कलिमलमुक्का विविक्कचोरिक्का ।  
पावरयसुरयरिक्का साहू गुणरयणचच्चिक्का ॥
- [४०] साहुत्तिसुट्ठिया जं आयरिआई तओ य ते साहू ।  
साहुभणिएण गहिया तम्हा ते साहुणो सरणं ॥
- [४१] पडिवन्नसाहुसरणो सरणं काउं पुणो वि जिनधम्मं ।  
पहरिसरोमंचपवंच कंचुयंचियतणू भणइ ॥
- [४२] पवरसुकएहि पतं पतेहि वि नवरि केहि वि न पतं ।  
तं केवलिपन्नतं धम्मं सरणं पवन्नोऽहं ॥
- [४३] पतेण अपतेण य पताणि य जेण नरसुरसुहाइं ।  
मुक्खसुहं पुण पतेण नवरि धम्मो स मे सरणं ॥
- [४४] निद्धलियकलुसकम्मो कयसुहजम्मो खलीकयअहम्मो ।  
पमुहपरिणामरम्मो सरणं मे होउ जिनधम्मो ॥
- [४५] कालत्तए वि न मयं जम्मणजरमरणवाहिसयसमयं ।  
अमयं व बहुमयं जिनमयं च सरणं पवन्नोऽहं ॥
- [४६] पसमिअकामपमोहं दिट्ठाऽदिट्ठेसु न कलिय विरोहं ।  
सिवसुहफलयममोहं धम्मं सरणं पवन्नोऽहं ॥
- [४७] नरयगइगमनरोहं गुणसंदोहं पवाइनिक्खोहं ।  
निहणियवम्महजोहं धम्मं सरणं पवन्नोऽहं ॥
- [४८] भासुरसुवन्नसुंदर रयणालंकारगारवमहग्घं ।  
निहिमिव दोगच्चहरं धम्मं जिनदेसिअं वंदे ॥
- [४९] चउसरणगमनसंचिय सुचरियरोमंचअंचियसरीरो ।  
कयदुक्कडगरिहाऽअसुह-कम्मक्खय-कंखिरो भणइ ॥

- [५०] इहभवियमन्नभविअं मिच्छत्तपवत्तणं जमहिगरणं ।  
जिनपवयणपडिकुट्ठं दुट्ठं गरिहामि तं पावं ॥
- [५१] मिच्छत्तमंधेणं अरिहंताइसु अवन्नवयणं जं ।  
अन्नाणेण विरइयं इण्हं गरिहामि तं पावं ॥
- [५२] सुअधम्मसंघसाहुसु पावं पडिनीययाइ जं रइअं ।  
अन्नेसु य पावेसु इण्हं गरिहामि तं पावं ॥
- [५३] अन्नेसु य जीवेसु मिती करूणाइ गोयरेसु कयं ।  
परियावणाइ दुक्खं इण्हं गरिहामि तं पावं ॥
- [५४] जं मनवयकाएहिं कयकारिअ अनुमईहिं आयरियं ।  
धम्मविरुद्धमसुद्धं सत्वं गरिहामि तं पावं ॥
- [५५] अह सो दुक्कडगरिहा दलिउक्कडदुक्कडो फुडं भणइ ।  
सुकडाऽनुरायसमुइण्ण पुन्नपुलयंकुरकरालो ॥
- [५६] अरिहंतं अरिहंतेसु जं च सिद्धत्तणं च सिद्धेसु ।  
आयारं आयरिए उवज्झायत्तं उवज्झाए ॥
- [५७] साहूण साहुचरिअं च देसविरइं च सावयजणाणं ।  
अनुमन्ने सत्वेसिं सम्मतं सम्मदिट्ठीणं ॥
- [५८] अहवा सत्वं चिय वीयराय वयणानुसारि जं सुकयं ।  
कालत्तए वि तिविहं अनुमोएमो तयं सत्वं ॥
- [५९] सुहपरिणामो निच्चं चउसरण-गमाइ आयरं जीवो ।  
कुसलपयडीओ बंधइ बद्धाउ सुहानुबंधाओ ॥
- [६०] मंदनुभावा बद्धा तिव्वनुभावाओ कुणइ ता चेव ।  
असुहाओ निरनुबंधाओ कुणइ तिव्वाउ मंदाओ ॥
- [६१] ता एयं कायत्वं बुहेहिं निच्चंपि संकिलेसम्मि ।  
होइ तिकालं सम्मं असंकिलेसंमि सुकयफलं ॥
- [६२] चउरंगो जिनधम्मो न कओ चउरंगसरणमवि न कयं ।  
चउरंगभवुच्छेओ न कओ हा हारिओ जम्मो ॥
- [६३] इइ जीवपमाय महावीर भदंतमेवमज्झयणं ।  
झाएसु तिसंझम-वंझकारणं निव्वुइसुहाणं ॥

। मुनि दीपरत्तसागरेण संशोधितः सम्पादितश्च “चउसरणं पइण्णयं सम्मतं” ।